

# Pejalan kaki warga emas maut dirempuh pacuan empat roda

oleh ROSILAWATI ROSEDI 10 November 2023 09:18am Masa membaca: 1 minit



Gambar hiasan

LIPIS - Seorang pejalan kaki maut selepas dirempuh sebuah pacuan empat roda di Kilometer (KM) 22 Jalan Lipis-Merapoh di sini pada Khamis.

Ketua Polis Daerah Lipis, Superintenden Azli Mohd Noor memberitahu, dalam kejadian kira-kira 7.10 petang itu, mangsa, Andi Aziz Berlian, 75, beralamat dekat Padang Tengku meninggal dunia di Unit Kecemasan Hospital Kuala Lipis.

Menurutnya, siasatan awal mendapati kemalangan berlaku apabila pacuan empat roda jenis Toyota Hilux yang dipandu seorang lelaki berusia 32 tahun bersama empat orang penumpang dari Padang Tengku menghala ke Merapoh.

"Apabila sampai di tempat kejadian, tiba-tiba pemandu telah melihat mangsa telah melintas jalan dari arah kiri jalan ke kanan dalam keadaan berlari.

"Pemandu itu telah menekan brek kenderaannya namun tidak dapat mengelak lalu merempuh mangsa," kata beliau dalam kenyataan pada Jumaat.

Ujar Azli, mangsa telah dikejarkan ke hospital oleh ambulans untuk dirawat dan pada jam 8.35 malam, pihak polis menerima makluman warga emas itu telah meninggal dunia.

Tambah beliau, bedah siasat akan dijalankan selepas menjalani ujian Covid-19.

"Siasatan lanjut diteruskan dan kes disiasat mengikut Seksyen 41 (1) Akta Pengangkutan Jalan (APJ) 1987," tambah beliau.